





## MANGGALA

OM SUWASTYASTU,

OM AWIGNAM ASTU NAMA SIDHAM.

Désa pakraman mula wantah pawakan pasayuban krama désa rawuhing kulawarga pawongania manut dresta. Désané kamanggehang *Buwana Agung*, pawongania suang-suang pinaka *Bhuwana Alit*. Adung patemoning bhuwana kalih, larapan santha jagadhita, sinanggeh murdaning prayojana angriptaning awig-awig. Sotaning bhuwana agung, désané wantah pawakan bhuwana maurip jangkep saha *Tri Hita Karana*, luiré :

1. *Parhyangan* : sahanan khayangan, panyiwian désa genah ngarcana Hyang Widhi, maka atma désané.
2. *Pawongan* : warga désané sami pawakan trikaya, mahawinan désané sidha molah maprawerti.
3. *Palemahun* : tanah saha dagingnia sajeroning wewengkon désa adaté, sinanggeh angga sarira taulan désané.

Sajaba dresta inucap, pamekas Pancasila, Undang-undang Dasar Negara Républik Indonésia warsa 1945 miwah sahanan uger-uger guru wisésa tan maren manggeh kainggilang.

Asing-asing parilaksana tan maren malarapan antuk dharmatula mawirasa manut *désa kala patra* saha *tri semaya kala*, inggih punika : *atita - nagata - wartamana*, malarapan antuk kayun raksa rumaksa, *paras paros sarpa naya salunglung sabayan taka*. Punika awinannya majalaran saking panghyangning *Hyang Parama Wisésa*, paruman pamucuk saha krama Désa Adat Sembung, nunggalang kayun, mupulang parikramaning adat tur kaungganghang ring awig-awig maka pangéling-éling satmaka sepat siku pamatut ritapkala midabdabin kasukertan lingganing *Tri Hita Karana* wastu kasidan sekala lan niskala.

Om Shanti, Shanti, Shanti Om

## PIDAGING BUKU AWIG-AWIG

MANGGALA .....	ii
PIDAGING BUKU AWIG-AWIG.....	iii
Sarga I. MURDHA CITTA.....	1
Sarga II. ARAN LAN WEWIDANGAN DÉSA .....	1
Sarga III. PETITIS LAN PAMIKUKUH.....	1
Sarga IV. SUKERTA TATA PAKRAMAN.....	2
Palet 1. Indik Krama .....	2
Palet 2. Indik Prajuru .....	5
Palet 3. Indik Kulkul .....	6
Palet 4. Indik Paruman.....	7
Palet 5. Indik Druén Désa .....	9
Palet 6. Sukerta Pamitegep .....	11
Kaping 1. Indik Karang, Tegal lan Carik .....	11
Kaping 2. Indik Pepayonan .....	11
Kaping 3. Indik Wewangunan.....	12
Kaping 4. Indik Wewalungan.....	13
Kaping 5. Indik Bhaya.....	13
Kaping 6. Indik Panyanggran Banjar .....	14
Sarga V. SUKERTAN TATA AGAMA .....	15
Palet 1. Indik Déwa Yajnya .....	15
Palet 2. Indik Resi Yajnya .....	20
Palet 3. Indik Pitra Yajnya.....	20
Palet 4. Indik Manusa Yajnya.....	23
Palet 5. Indik Bhuta Yajnya.....	24

Sarga VI. SUKERTA TATA PAWONGAN.....	26
Palet 1. Indik Pawiwahan.....	26
Palet 2. Indik Nyapian.....	28
Palet 3. Indik Sentana .....	30
Palet 4. Indik Warisan.....	32
Sarga VII. WICARA LAN PAMIDANDA .....	33
Palet 1. Indik Wicara.....	33
Palet 2. Indik Pamidanda .....	34
Sarga VIII. NGUWAH NGUWUHIN AWIG-AWIG .....	35
Sarga IX. SAMAPTA.....	36
LEPIHAN .....	37

## SARGA I

### MURDHA CITTA

OM AWIGNAM ASTU NAMO SiDHAM, putusing paséban krama Désa Adat Sembung gumawé awig-awig désa pakraman maka sepat siku-siku pameneh, wastu kasidan prayaan mami kabéh prasama angidep mwah amagehaken kadi linging awig-awig iki.

## SARGA II

### ARAN LAN WEWIDANGAN DÉSA

#### Pawos 1

- (1). Désa pakraman puniki mawasta Désa Adat Sembung.
- (2). Jebar kakuub wewidangannia mawates nyatur désa :
  - ha. Sisih kalér : Désa Adat Karangjung.
  - na. Sisih wétan : Désa Adat Sembung Sobangan.
  - ca. Sisih kidul : Désa Adat Banjar Sayan.
  - ra. Sisih kulon : Désa Adat Kekeran.
- (3). Wewidangan Désa Adat Sembung punika kepeh dados 4 (petang) banjar.
  - ha. Banjar Dajan Peken.
  - na. Banjar Pasekan.
  - ca. Banjar Tauman.
  - ra. Banjar Belang.

## SARGA III

### PETITIS LAN PAMIKUKUH

#### Pawos 2

Désa Adat Sembung ngamanggehang pamikukuh minakadi:

- ha. Pancasila lan Undang-Undang Dasar RI 1945.
- na. Pasuara Sang Angawa Rat.
- ca. Tri Hita Karana manut Sad Acara Agama Hindu.
- ra. Catur Dresta, inggih punika Désa Dresta, Loka Dresta, Purwa Dresta saha Sastra Dresta.

Pawos 3

Luir petitis Désa Adat Sembung :

- ha. Mikukuhin miwah ngrajegang Sang Hyang Agama.
- na. Nginggilang tata prawertining magama.
- ca. Ngrajegang kasukertan désa saha pawongannia sekala niskala.

SARGA IV

**SUKERTA TATA PAKRAMAN**

Palet 1

**Indik Krama**

Pawos 4

- (1). Sané kabawos krama Désa Adat Sembung, inggih punika :
  - ha. Kulawarga magama Hindu sané jumenek ring wewengkon palemahan Désa Adat Sembung.
  - ca. Kulawarga sané mawiwit saking Désa Adat Sembung malinggih ring dura désa sané nyungsung Kahyangan Tiga Désa Adat Sembung.
- (2). Sajaba punika sinanggeh tamiyu.

Pawos 5

Krama désa inucap kepeh dados 3 (tigang) soroh, inggih punika :

- (1). Krama Ngarep, kulawarga sané negen ayah karang palemahan désa.
- (2). Krama Ngelé, kulawarga sané sampun alaki rabi, sané tan negen ayah karang palemahan désa.
- (3). Krama Tamiyu, kulawarga dura désa magama Hindu sané jumenek turmaning kayun nyikiang raga ring désa pakraman.

Pawos 6

Kawit dados krama désa, luihé :

- ha. Sangkaning wed ngemong utawi ngenahin karang sané negen ayah karang palemahan désa.
- na. Mawiwit saking pawiwahan.
- ca. Mawiwit jumenek magenah sajeroning palemahan Désa Adat Sembung.

Pawos 7

Panemaya tedun makrama désa :

- ha. Krama Ngarep lan Krama Ngelé ngawit Tumpek Kuningan.
- na. Krama Tamiyu, ngawit a-sasih risampuné jumenek ring Désa Adat Sembung.

Pawos 8

Sahanan krama désa sami keni tetegenan, luihé :

- (1). Ayah Nyumek, mapiteges ayah miwah urunan mamungkul saking krama ngarep.
- (2). Ayah Balu, mapiteges ayah aparo miwah urunan mamungkul saking krama ngarep sané kasinanggeh balu.
- (3). Ayah miwah urunan pangelé, saking krama pangelé suang-suang banjar, manut wiguna.
- (4). Tetegenan ayah saha urunan krama tamiyu, kasukserahang ring suang-suang banjar, manut pararem.

Pawos 9

Krama désa kadadosang :

- (1). Mapuankid utawi tan tedun ngayah kéngin wantah apisan, sajabaning wénten kabébasan saking prajuru.
- (2). Nyada, mapiteges nyédayang ayah risampuné mayusa 70 warsa saha sampun polih kabébasan manut pararem prajuru; yan sampun nyada tan kéngin yuksukin ayah malih.
- (3). Sané kawenangang nyuksukin ayah, kulawarga sané sampun alaki rabi utawi sané sampun manggeh deha-teruna turmaning mrasidayang nganutin krama.
- (4). Nugtug ayah antuk artha brana, saantukan; kapiulangan, kajudi antuk sang angawa rat, utawi malelungayan ka dura désa mawates salami 6 (enem) sasih. Ageng alit panugtug ayah punika manut pararem.

#### Pawos 10

Wusan dados krama désa luihé :

(1). Sangkaning :

- ha. pinunas ngraga menawi késah ka dura désa utawi nglangkungin segara.
- na. Kanorayang, duaning sampun tan prasida ngeséhin solah maprawerti setata nguwug mamurug kecaping awig-awig.

(2). Sang wusan makrama :

- ha. Patut nyukserahang gegambelan padruén désa.
- na. Tan polih pah-pahan sangkaning padruén désa, sajawaning pah-pahan padruén sekaa manut pararem.

#### Pawos 11

Swadarmaning krama, inggih punika :

- (1). Sanggup nyiwi Kahyangan Désa.
- (2). Tuut satinut ring daging awig-awig, sima lan pararem désa.
- (3). Sareng miara utawi niténin sahanan padruéan désa.
- (4). Tanmaren ngutsahayang mangda désané mrasidayang nyujur petitis lan pamikukuh manut pawos 2 lan pawos 3 ring ajeng.
- (5). Patut setata nyungsung ngamiikang kasukertan désa.

#### Pawos 12

Petias utawi olih-olihan krama désa, luihé :

- (1). Polih pasayuban prajuru.
- (2). Kabawosin saha katiwakang pamutus sahanan wicarannia.
- (3). Nyarengin paruman désa saha wenang mastikayang pamutus.
- (4). Dados milih tur kapilih rikala ngrajegang prajuru désa.

Palet2

### Indik Prajuru

Pawos 13

- (1). Désa Adat Sembung, kaénter antuk Bendésa Adat utawi Kelihan Désa.
- (2). Suang-suang banjar, kaénter antuk Kelihan Banjar.
- (3). Kelihan Désa lan Kelihan Banjar, patut :
  - ha. Mawiwit saking krama ngarep.
  - na. Kaadegang malarapan antuk pakardin peparuman nyabran 5 (limang) warsa, sajawaning wénten pariindik tios, tur dados kapilih malih.
  - ca. Maduluran déwa saksi ring Pura Désa Balé Agung.

Pawos 14

- (1). Kelihan Désa Adat Sembung, kasanggra antuk angga prajuru, luihé :
  - ha. Patajuh utawi Pangliman pinaka wakilnia.
  - na. Panyarikan pinaka juru surat.
  - ca. Patengen pinaka pangemong druén désa.
  - ra. Kasinoman pinaka juru arah.
  - ka. Kelihan Banjar pangénter banjar.
- (2). Kasinoman akéh ipun manut wiguna.
- (3). Sajeroning ngénterang kasukertan niskala, kelihan désa mingsingghang Pamangku Kahyangan Désa.

Pawos 15

- (1). Swadarmaning Kelihan Désa saha prajuru désa, luihé :
  - ha. Ngénterang pamargin sadaging awig-awig miwah pararem désa.
  - na. Nuntun tur ngénterang krama rawuhing warga désa ngupadi antuk petitis désa adat.
  - ca. Mawosin kalih niwakang pamatut arep ring wicara warga désa.
  - ra. Maka duta désa matemuang bawos ring sapa sira ugi.
- (2). Pradé prajuru désa iwang panglaksana, keni pamidanda nikel ring kaiwangan suang-suang krama, saha kangkat kararianang.

Pawos 16

Petias utawi olih-olihan prajuru désa, luihé :

- ha. Luput rerampén utawi peson-peson.
- na. Polih tanding tengah.
- ca. Upon pacatu utawi palaba saha petias tiosan manut pararem.

Pawos 17

(1). Prajuru désa kagentosan riantukan :

- ha. Séda.
- na. Kanorayang duaning iwang pamargi menawi iwang sesana.
- ca. Wit saking pakayun rahayu utawi pinunas ngraga.
- ra. Risampun buntas panamaya 5 (limang) warsa.

(2). Nganorayang utawi ngentosin prajuru, patut sajeroning paruman, tur kaingkupin antuk krama désa.

Palet 2

**Indik Kulkul**

Pawos 18

(1). Kulkul ring Désa Ada Sembung luihé :

- ha. Kulkul désa.
- na. Kulkul banjar.
- ca. Kulkul pamaksan utawi sekaa-sekaa.

(2). Tabuh tetepakan kulkul désa :

- ha. Tigang tulud bulus, maka cihna wénten bhaya agung.
- na. Kalih tulud bulus, maka cihna agnibhaya.
- ca. Atulud banban, maka cihna ngayah utawi paruman.

(3). Tetengeran kulkul suang-suang banjar :

- ha. Tigang tulud bulus, maka cihna wénten bhaya agung.
- na. Kalih tulud, bulus maka cihna agnibhaya.

- ca. Atulud banban, maka cihna sangkep utawi ngayah.
  - ra. Atulud ngalad-alad, maka cihna wong raré kalayu sekar saha raris kapendem.
  - ka. Tabuh akelentungan, maka cihna wénten wong raré embas.
  - da. Tabuh duang klentungan, maka cihna wénten sané ngrangkat.
  - ta. Tabuh tigang klentungan, maka cihna wénten krama sané kalayu sekar.
- (4). Tetengeran kukul Pamaksan, Sekaa-Sekaa, samaliha kukul sané lianan upami kukul pondokan, tan kalugra nyawerin pateh sakadi tepak tetengeran kukul désa saha kukul banjar. Pradé mamurug, keni pamidanda manut pararem.

#### Pawos 19

- (1). Kukul désa utawi kukul banjar sané wenang kaungghang nepak, wantah prajuru adat suang-suang saha sané kapituduh.
- (2). Pradé wénten cihna bhaya sapa sira ugi wenang nepak kukul désa utawi banjar, sakéwanten sasampuné matur supéksa ring prajuru mungguing kabuatan ipun.
- (3). Sapa sira ugi sané mamurug utawi nepak tan kapituduh lianan ring cihna bhaya, patut keni pamidanda manut pararem.

#### Palet 4

### **Indik Paruman**

#### Pawos 20

- (1). Paruman utawi sangkepan ring Désa Adat Sembung, inggih punika :
- ha. Sangkepan désa, sané kasungkemin olih krama désa :
    - 1. Kawéntenang nyabran warsa ritakala nyanggra Tawur Kasanga.
    - 2. Padgata utawi napkala, yéning wénten indik sané mabuat, pacang kawéntenang sangkepan manut arah-arah.
    - 3. Sangkepan Prajuru Désa utawi Prajuru Adat kawéntenang manut wiguna utawi kabuatan ipun.

- na. Sangkepan banjar, sané kasungkemin olih krama banjar.
1. Kawéntenang nyabran sasih, ritatkala Tumpek (Saniscara Kliwon), maka cihna tanpa arah-arah dwaning sampun tetep panumaya, manut pararem suang-suang banjar.
  2. Padgata utawi napkala, wénten indik sané mabuat pacang kawéntenang pasangkepan manut arah-arah.
- ca. Sangkepan sekaa-sekaa manut kabuatan ipun.
- (2). Sangkepan désa utawi banjar, dudonan ipun sakadi ring sor :
- ha. Prasida lumaksana risampun katedunin antuk sang patut ngamiletin, kamanggala antuk tetengeran kulkul, abusana sané kapatutang, saha tan kalugra makta gegawan sakaluiré.
  - na. Tan maren ngarcana ring Ida Bagawan Panyarikan maka widhiwidana cané.
  - ca. Maka sarana janggi, saha pangawit kalaksanayang panyacak sép-sépan.
  - ra. Sasampuné wusan parembeyan, sadurung paruman puput, patut kawéntenang panyacak panguntat.
  - ra. Pamutus bebawos, patut mucukang dharma tula parembeyan kaadungan sareng sami. Yan tan mrasidayang polih kaadungan sareng sami (*briuk panggul*), patut kamanggehang suara paling akéh.
  - ka. Tan kalugra ngwetuang biuta utawi suara ghora ring sangkepan. Yan wénten asapunika, keni pamidanda béa pacamil dandaning nguman-uman ring sabha.
- (3). Pradé pidaging paruman tan kaingkupin, Prajuru Désa utawi Prajuru Banjar ngutsahayang ngilikang pabawos, saha pamutus mangda kararemin antuk krama. Bilih tan prasida kasungkemin jantos ping tiga, prajuru inucap wenang nunas bawos ring Sang Ngawa Wenang.

#### Pawos 21

- (1). Sajeroning paruman désa utawi paruman banjar, Kelihan Désa utawi Kelihan Adat patut nyiarang pamargin ngénterang désa utawi banjar, pamekas ngeninin indik :

kaca .

- ha. Munjuk lungsuring krama, saha ayah-ayah, sulur artha brana padruén désa utawi banjar.
  - na. Pralekita utawi pangrencana usaha désa kapungkur.
- (2). Pamutus paruman désa utawi banjar sinangeh pararem, maka pamitegep pamargin awig-awig.

Pawos 22

- (1). Sangkepan Prajuru Désa utawi Prajuru Adat, kawenangannya wantah ngrincikang pangrencana usaha (*pralekita*) désa utawi banjar kapungkur.
- (2). Sangkepan Prajuru Désa utawi Prajuru Adat, tang kawenang ngamedalang tetegenan ring krama sadurung kaingkupin antuk krama.
- (3). Pamutus sangkepan Prajuru Désa utawi Prajuru Adat, wantah ngwetuang pasuara maka pidaging pituduh Sang Ngawa Rat utawi ngonékang pecak pararem krama kapungkur.

Palet 5

**Indik Druén Désa**

Pawos 23

Padruén Désa saha Banjar sawewengkon Désa Adat Sembung, sakadi ring sor puniki:

- (1). Pura utawi Kahyangan, luiré :
  - ha. Kahyangan Tiga (Pura Désa / Balé Agung, Pura Puseh lan Pura Dalem / Mrajapati).
  - na. Kahyangan tiosan (Pura Dalem Paruman, Pura Wana Suci, Pura Penataran, Pura Batur, Pura Dalem Rangkan utawi Dalem Tunon, Pura Dalem Hyang Api utawi Pucak Geni, Pura Dalem Mungsu utawi Dalem Alit, Pura Dalem Tungku utawi Dalem Swargan).
  - ca. Pura Melanting pinaka hulun pasar.
  - ra. Pura Ulun Suwi pinaka hulun sawah.
- (2). Palemahan désa makadi karang désa, tlajakan pura, palaba pura miwah karang tlajakan banjar.
- (3). Pasar lan tlajakan pasar.

- (4). Sétra lan tlajakan sétra.
  - (5). Balé wantilan désa, balé banjar saha wewangunan tiosan.
  - (6). Margin désa, banjar lan margi ka sawah miwah sesunutan.
  - (7). Lelanguan, makadi tetabuhan lan ilén-ilén drué pura saha banjar.
  - (8). Lembaga Perkréditan Désa (LPD) Désa Adat Sembung.
- Padruén ring ajeng patut kailikitaang saha kasamakuta suang-suang pangemong.

#### Pawos 24

- (1). Prajuru Désa utawi Prajuru Banjar Adat, wenang ngétangang pamupon laba pura lan sapanunggilan druén désa utawi banjar.
- (2). Pikolih lan pamupon ipun kaanggén nyanggra prabéa piodalan saha wewangunan ring désa pakraman manut wiguna.
- (3). Nyabran sangkepan utawi paruman krama, prajuru pangemong punika ngwéntenang pariindik munjuk lungsuring padruéan inucap ring krama désa utawi krama banjar.
- (4). Sakaluiring druén désa utawi banjar, patut wénten ilikitannia.
- (5). Tan kalugra ngadol utawi ngésahang padruén désa utawi banjar punika yan tan kasungkemin antuk krama sami manut pararem.

#### Pawos 25

- (1). Padruén Désa Adat Sembung lian ring sané menggah ring pawos 23, kangkat kapiolihang saking:
  - ha. Urunan utawi peson-peson saking krama désa.
  - na. Wantuan utawi paridana saking Sang Angawa Rat.
  - ca. Wantuan siosan sané patut.
  - ra. Dana punia.
  - ka. Usaha-usaha tiosan sané patut.
- (2). Padruéan désa sané marupa barang mangdané kapiara becik, sané marupa artha mangda kasimpen ring genahé sané aman, bank utawi Lembaga Perkréditan Désa (LPD).

Palet 6

### **Sukerta Pamitegep**

Kaping 1

#### **Indik Karang, Tegal lan Carik**

Pawos 26

- (1). Krama désa sané nyungkemin karang pumahan sawewengkon palemahan Désa Adat Sembung, patut ngwatesin karang inucap mangda pastika lan kakantenannia asri.
- (2). Wates karang punika manut dresta sané kabawos magaleng kaluwan inggih punika kaler lan kangin, patut kakaryanin saha kapiara suang-suang krama.
- (3). Pradé wates makadi turus, pagehan utawi témbok nglikadin, yan pada arsa panyandingnia, wates punika kangkat nganggé pinget, sakéwanten kasaksi antuk prajuru désa utawi pracihna saking Sang Angawa Rat.
- (4). Yan wénten karang pumahan sané kabebeng, mangdané prajuru désa ngutsahayang pamargi medal, sakéwanten prabéan ipun kategen olih sané nyungkemin karang punika.

Pawos 27

- (1). Sinalih tunggil krama désa tan kalugra :
  - ha. Nglahlah utawi ngalah-alah : margi, karang, tegal, sawah lan salantur ipun druén désa utawi druén krama tiosan.
  - na. Nglahlah utawi ngalah-alah tanah tegak Kahyangan, sétra lan sakancan tegak sané kasinanggeh suci.
- (2). Pradé wénten sakadi ring ajeng, sang sané nglahlah punika kapatutang ngwaliang tanah inucap, saha keni pamidanda sapatuta, manut pararem kadulurin upakara lan upacara ring panglahlah genah sané kasinanggeh suci.

Kaping 2

#### **Indik Pepayonan**

Pawos 28

- (1). Ngawit nandur pepayonan tanem tuwuh patut adepa agung ngjeroang saking wates karang pumahan.

- (2). Yan wénten tetanduran ngungkulin tur nyayubin karang pisaga utawi margin désa, samaliha marupa mayanin, patut kawara antuk paiguman pinih riyin, mangda prasida sané madrué tetanduran punika ngingsirang utawi notor manut sepat gantung.
- (3). Pradé sampun kawara taler tan wénten usaha sang nruénang tetanduran punika, sané rumasa kasayubin utawi kajerihan wenang masadok ring prajuru désa, tur sasampuné kaparitetes, kalugra ngicalang tetanduran inucap, sakéwanten patinia patut kataur manut panglokika sané nepasin, utawi witnia kawaliang ring sang madrué tetanduran punika.
- (4). Sang keni pamidanda panyangaskara saha prabéa manut pararem arep ring wewangunan sané karubuhin, luihé :
  - ha. Sang nruénang pepayonan sané sinanggeh mayanin, pradé pungkak ngrubuhin wewangunan krama tios.
  - na. Sang sané notor, munggul utawi ngrebah pepayonan tur ngrubuhin wewangunan krama tios.
- (5). Krama désa sami patut ngmanggehang kawerdian tanem tuwuh lan tetanduran sawewengkon Désa Adat Sembung, sané makahawinan widang palemahan désané asri lestari.

### Kaping 3

#### **Indik Wewangunan**

Pawos 29

- (1). Krama désa nyabran ngwangun patut:
  - ha. Masadok ring prajuru désa, ping ajeng pradé wewangunan punika ngeninin wates.
  - na. Nganggé astha bhumi miwah gegulak asta kosala kosali sanistané manut petitis niskala.
  - ca. Tan nyayubin kapisaga.
- (2). Pradé wewangunan inucap jantos nyayubin, bilih-bilih témboké ring telenging wates sané tan kasungkemin, risampuné kawara tur kasadokang ring prajuru, wenang kadanda manut pararem, saha wewangunan inucap kagubar, utawi sanistané mangda kakaryanang abangan.

#### Kaping 4

#### **Indik Wewalungan**

#### Pawos 30

- (1). Sahanan krama désa mamiara wewalungan (bawi risampun mabelas, banteng, misa, kebo sané sampun matlusuk, kuda miwah sané tiosan) patut sayaga nuréksain makadi nglogor utawi negul, mangda tan ngranjing ngrusak karang utawi pabianan krama sios, bilih-bilih jantos ngranjing ngletehin kahyangan.
- (2). Pradé wénten wewalungan malumbar utawi ngeléb ngrusak pakarangan utawi pabianan krama sios, risampuné kawara kéngin kataban tur kadanda ngwaliang sané karusak saha naur panebas tetabanan, anut panglokika prajuru désa.
- (3). Pradé ngletehin genah suci minakadi, pura, sanggah, mrajan risampuné kaparitas antuk prajuru désa, wenang sang madrué wewalungan punika kadanda mabuhu agung tetebasan prascita durmanggala, maduluran caru Panca Sata. Krama désa patut nyanggra wewalungan miwah sarwa prani, tan kapatut ngamademang paksi miwah nuba ulam miwah sané tiosan, sajaba jagi kaanggé upakara.

#### Kaping 5

#### **Indik Bhaya**

#### Pawos 31

- (1). Pari indik bhaya, luiré : jiwa bhaya, artha bhaya, duracara ring agama, saha panca bhaya.
- (2). Sang manggihin sahanan jiwa bhaya, patut nepak kulkul bulus manut sané sampun kasungkemin, saha mapitulung tur masadok ring prajuru.
- (3). Pradé ring désa kahanan jiwa bhaya, sasampuné mapitulung, désané patut ngaturang bhuta yajnya, tur sang mayanin kaatur ring sang angawa wenang.
- (4). Pradé wénten jadma sané mamisuh utawi nguman-uman jadma tios, kakeninin pamidanda béa pacamil tetebasan prascita.

Pawos 32

- (1). Sang manggihin kahanan artha bhaya (*kapandangan*), patut nepak kulkul saha mapitulung. Salantur ipun sané kamalingan atur supéksa ring prajuru désa sané pacang netes lan nimbangin anut daging pararem utawi pasuara Sang Angawa Wenang, saha mawuwuh panyangaskara pradé sané kamaling barang kasinanggeh suci.
- (2). Pratingkahé mapailon ring dusta kabawos saruron. Pradé wénten jadma manggihin dusta tan nyadokang ring prajuru désa jantos jadma tios nyaduang, patut kadanda kadi dandaning dusta manut cacakan banjar. Pradé kantos ping tiga malaksana asapunika wenang kasukserahang ring Sang Angawa Wenang.
- (3). Pradé wénten jadma sané ngrereh reramon minakadi daun kelapa utawi ron tan pasadok ring sang nruénang, yan kacunduk patut kadanda kadi dandaning dusta.
- (4). Yéning wénten jadma ngranjing pakubon wiadin pakarangan rikala suwung, mawastu sang madrué karang kaicalan, wenang jadma inucap katuwekang antuk madéwa saksi ring Pura Désa.
- (5). Mangda tan katuwekang manut ring ajeng, asing-asing ngranjing pakubon jadma tios, patut:
  - ha. Matetengeran suara utawi makaukan.
  - na. Nyantos sang nruénang kubu rawuh, utawi masadok ring pangapit pinih tampek maka buatan pangranjingé inucap.
  - ca. Pamedal karangnia kadagingin sawén, maka cihna pangarah rikala suwung.

Kaping 6

**Indik Panyanggran Banjar**

Pawos 33

- (1). Krama désa rikala ngwéntenang karya suka duka, patut kasanggra antuk banjar, manut pinunas sang mayajnya.
- (2). Pasuguh utawi panguku rikala pangrombo karya punika manut panglokika suang-suang banjar, majalaran abot dangan karya sané kabuatang.

SARGA V

**SUKERTAN TATA AGAMA**

Palet 1

**Indik Déwa Yajnya**

Pawos 34

(1). Palinggih panyiwian sawewengkon Désa Adat Sembung inggih punika :

1. Kahyangan Tiga : Pura Désa / Balé Agung, Pura Puseh lan Pura Dalem saha Pura Mrajapati pangulun sétra.
2. Kahyangan tiosan, minakadi : Pura Dalem Paruman, Pura Wana Suci, Pura Penataran, Pura Dalem Rangkan utawi Dalem Tunon, Pura Batur, Pura Dalem Yang Api utawi Pucak Geni, Pura Dalem Mungsu utawi Dalem Alit, Pura Dalem Tungkub utawi Dalem Swargan saha Parhyangan Ratu Lingsir lan Ratu Alit Sakti.
3. Pura Melanting, pangulun pasar.
4. Pura Ulun Suwi, pangulun sawah.
5. Pura Ulun Banjar, Pura Panti, Pura Kawitan, Pura Paibon saha Pura Pamaksan tiosan.

(2). Rahina piodalan kahyangan inucap, kadi ring sor puniki:

1. Kahyangan Tiga :
  - ha. Pura Désa / Balé Agung nuju Buda Umanis Medangsia.
  - na. Pura Puseh, nuju Buda Kliwon Sinta.
  - ca. Pura Dalem, nuju Wraspati Umanis Pahang.
  - ra. Pura Mrajapati, nuju Buda Umanis Prangbakat.
2. Kahyangan tiosan :
  - ha. Pura Dalem Paruman, nuju Wraspati Umanis Dunggulan.
  - na. Pura Wana Suci, nuju Purnamaning Kapat.
  - ca. Pura Penataran Balér Pasar, nuju Redité Kliwon Pujut.
  - ra. Pura Penataran Belang, nuju Wraspati Kliwon Ukir.
  - ka. Pura Dalem Rangkan utawi Dalem Tunon, nuju Anggara Kasih Prangbakat.



- da. Pura Batur, nuju Purnamaning Kapat.
  - ta. Pura Dalem Hyang Api utawi Pucak Geni, nuju Buda Manis Prangbakat.
  - sa. Pura Dalem Mungsu utawi Dalem Alit, nuju Buda Kliwon Dunggulan.
  - wa. Pura Dalem Swargan, nuju Anggara Kasih Medangsia.
  - la. Parhyangan Ratu Lingsir, nuju Tumpek Landep.
  - ma. Parhyangan Ratu Alit Sakti, nuju Anggara Kasih Tambir.
3. Pura Melanting, nuju Buda Cemeng Klawu.
  4. Pura Ulun Suwi, nuju Soma Pon Sinta.
- (3). Pangaci ring pura utawi kahyangan inucap manut kecap sastra agama, sané kamargiang nista, madya, utama malarapan kawéntenan saha pararem.
- (4). Sahanan pura utawi kahyangan sawewengkon Désa Adat Sembung, manut dresta kasamakuta saha kaempon suang-suang banjar sakadi ring sor puniki:
1. Pura Kahyangan Tiga (Désa / Balé Agung, Dalem, Puseh lan Dalem Mrajapati), olih krama désa sami, saha kasanggra suang-suang banjar manut pararem.
  2. Pura kahyangan tiosan, minakadi:
    - ha. Pura Dalem Paruman lan Pura Penataran Balér Pasar, kasanggra krama Banjar Dajan Peken.
    - na. Pura Wana Suci lan Pura Dalem Tungkub utawi Dalem Swargan, kasanggra Krama Banjar Pasekan.
    - ca. Pura Dalem Rangkan utawi Dalem Tunon, Pura Batur, kasanggra krama Banjar Tauman.
    - ra. Pura Dalem Hyang Api utawi Pucak Geni, Pura Dalem Mungsu utawi Dalem Alit, Pura Penataran Belang, kasanggra krama Banjar Belang.
  3. Parhyangan Ratu Lingsir lan Ratu Alit Sakti kasanggra krama Désa Adat Sembung - Karangjung sinarengan, saha kaénter panyarikan utawi uger pura inucap.
  4. Pura Melanting Pangulun Pasar, kasanggra pamaksan pasar saha kaénter Kelihan Désa.
  5. Pura Ulun Suwi Pangulun Sawah, kasanggra krama Subak Cangi Tebén, Uma Dalem lan Abasan, saha kaénter olih Kelihan Subak utawi Pekaséh.

6. Ring palemahan pura inucap ring ajeng, wénten taler sareng kawangun palinggih, parhyangan saha Pura Pamaksan sakadi kamanggehang ring gambar ilikita.

#### Pawos 35

- (1). Ring suang-suang pura utawi kahyangan inucap, kawéntenang pamangku, saha panyarikan.
- (2). Ngadegang pamangku saha panyarikan, manut dudonan sakadi ring sor :
  - ha. Nyanjan utawi masemurang, suang-suang mapitegep mapinunas ring Ida Betara pinuji pamuwus.
  - na. Saking turunan utawi pratisentana lelintihan ipun.
  - ca. Kacatri saha kasungkemin olih krama pamaksan pura inucap.
- (3). Tan wenang kaanggén pamangku, luiré :
  - ha. Jadma sané cédangga, minakadi pécéng, pérot, cungh lan sapanunggilannia.
  - na. Jadma sané gering ila, ayan, buduh wiadin édan.
  - ca. Sang sapa sira ugi sané tan kapatutang manut pararem.
- (4). Prabéa Adiksa Widhi Pamangku kamedalang saha kalaksanayang antuk sang ngadegang, makadi krama désa anggén Pamangku Kahyangan Tiga, utawi pangempon pura suang-suang anggén kahyangan tiosan.
- (5). Ritakala pitra yajnya riwekas, pradé kulawarga pamangku inucap tan prasida ngamargiang sapari indik upacara punika, patut kasungkemin antuk krama désa ngeninin pangabénan Pamangku Kahyangan Tiga, utawi pangempon pura suang-suang ngeninin pangabénan Pamangku tiosan. Upacara yajnya inucap sanistané Brahma Prascita (Madius Kumaligi), saha panyanggran ipun manut pararem.
- (6). Pinaka petias pamangku polih ngarap palaba pura mamungkul, kéwanten patut taler ngaturang upakara Kajeng Kliwon, Purnama, Tilem, lan Padatengan.

#### Pawos 36

Swadarman pamangku, luiré :

- (1). Ngénterang upacara piodalan ring kahyangan utawi ring suang-suang pakubon krama.
- (2). Tan wenang salab-sulub; yan mamurug wenang pamangku inucap nyepuhin raga.
- (3). Pradé sinalih tunggil pamangku kapialangan utawi cuntaka, kéngin nyelang pamangku tios sawewengkon kahyangan ring Désa Adat Sembung, utawi nuwur

sulinggih manut ageng alit yajnya.

- (4). Samaliha yan pamangku sampun ngayah 3 (tigang) rahina ring pura nemu jagi wénten piodalan, kancit wénten kulawargannia séda, Pamangku inucap tan kenéng cuntaka, sakéwanten tan budal salami piodalan punika.
- (5). Pamangku sané sampun alaki rabi, rabinia sareng kapadik. Yan durung alaki rabi, bénjangan rikala ngambil rabi, sang rabi patut kaupakara matelah-telah utawi masapsap ring raga, saha kaprabéa antuk krama pangempon pura inucap.
- (6). Silih sinunggil yan wénten krama désa sané ngipik-ngipik saparipolah pamangku yan tan wénten kaiwangan ipun, sang sané malaksana punika keni pamidanda nyuciang pamangku inucap.

#### Pawos 37

Petias saha olih-olihan pamangku, luiré :

- (1). Panyolasan utawi sarin canang ring pura suang-suang, miwah pakubon krama désa sané ngamargiang upacara.
- (2). Upon-upon ngaryanin palaba sawah miwah tegal.
- (3). Luput pakaryan lan rerampén saha padagingan kadi patut.

#### Pawos 38

- (1). Pamangku kagentosin riantukan :

ha. Séda.

na. Pinunas ngraga, menawi kageringan lan sapanunggilannia.

ca. Kawusang antuk krama menawi malaksana sané tan patut, minakadi asta dusta.

- (2). Pradé pamangku kawusang sangkaning malaksana asta dusta, keni pamidanda manut pararem saha ngwaliang prabéa adiksa widhi.
- (3). Pamangku patut ngamangehang kasucian sesananing pamangku, luiré; tan wenang ajejudén, mamunyah, salab-sulub miwah sané siosan, saha mangda mautsaha malajahang raga ring sapariindik gegelaran pamangku miwah sastra agama.

Pawos 39

Kasukertan pura utawi kahyangan patut kamanggehang sakadi ring sor puniki :

(1). Tan kalugra ngranjing ka pura, luiré :

ha. Sang katiban Catur Cuntaka, makadi:

1. Sebel kandel ngraja swala, salami dérèng mabersih.
2. Sebel madrué putra, salami abulan pitung rahina.
3. Sebel panganténan, salami dérèng mabyiakala
4. Cuntaka sangkaning kalayu sekar manut sengker.

na. Makta barang layudan sinanggeh ngletehin.

ca. Sato agung sajawaning mapepada.

ra. Mabusana tan manut kadi tatacaraning ngranjing ka pura.

ka. Sadéréngé polih wak-wakan utawi pituduh prajuru désa.

(2). Pratingkahé tan wenang ring pura, luiré :

ha. Masumpah utawi mecor, sajawaning pituduh prajuru désa.

na. Makobetan, masesenengan, makolem dados asiki lanang wadon, mabacin, mawicara, njangsang busana, menahin pusungan lan salantur ipun.

ca. Mungghah tedun palinggih sajawaning pituduh prajuru.

(3). Tan kapatutang ngwéntenang klecan ring pura.

(4). Sang mamurug kecapé ring ajeng, keni pamidanda pamrascita sapatuta.

Pawos 40

(1). Yan wénten sang karawuhan ring pura, kéngin kapinton pradé rumasa kasumangsayan. Yan tan wiakti, jadmá inucap kasisipang manut pararem.

(2). Pradé pura utawi kahyangan kahanan durmanggala saha kapanca bhayan, pamangku patut digelis nyadokang ring prajuru désa mangda marumang krama désa tur ngwéntenang pamrascita sapatuta.

Palet 2

### Indik Resi Yajnya

Pawos 41

- (1). Sang pacang madeg pandita utawi pinandita makadi pamangku, balian sonténg, kabayan, dalang saha sakaluiring jagi ngénterang yajnya, patut masadok ring prajuru désa kalih Parisada Hindu Dharma.
- (2). Prajuru désa patut niténin tur wenang mialangin pradé wénten kacihnan sasar kecap, sastra miwah dresta; tur sareng nyaksinin upacara lan upakara, saha nyiarang ring pararem désa tegep rawuhing wates kawenangan pangénter yajnya.
- (3). Krama désa patut ngaturang ayah sapamadeg miwah ring panglepas sang sulinggih riwekas katuntun antuk prajuru désa.

Pawos 42

- (1). Sang sulinggih patut mucukang ngayunin ring wewidangan Désa Adat Sembung, sasampuné wawu muputang kajebar tios jagat utawi dura désa.
- (2). Krama désa patut sareng ngawas niténin katuntun antuk prajuru désa mangda sahanan yajnya sané kawéntenang kaicén pamuput olih Pandita utawi Pinandita manut kawenangannia.

Palet 3

### Indik Pitra Yajnya

Pawos 43

Pamargin Pitra yajnya madudonan sakadi ring sor puniki :

- (1). Pangupakaran sang kalayu sekar utawi seda, kamargiang :
  - ha. Antuk pamendeman utawi ngeseng, maka cihna pakingsan ring Ibu Pertiwi utawi ring Betara Brahma, salami nuptupang prabéa.
  - na. Atiwa-tiwa utawi upakara pangabénan.
- (2). Upakara saha upacara Pitra Yajnya riwusan ngabén mawastu mungguh daun bingin, saha nglinggihang Déwa Hyang Betara Betari.

Pawos 44

Swadhmaning lan tetegenan pradé wénten sinalih tunggil krama kalayu sekar, manut sakadi ring sor puniki:

(1). Sang kaduhkitan patut:

ha. Nyadokang ring Kelihan Adat lan Kelihan Désa, saha nunas tetimbangan ring kawéntenannia.

na. Ngaturin krama banjar ngrombo makarya eteh-ete sawa kadulurin panyembrama canang utawi wédang sesida antuk.

(2). Swadharmaning krama adat :

ha. Kelihan Adat maritetes pamargin sang kaduhkitan, napiké pacang kapendem, makingsan riin utawi lantur kageseng utawi kaabén.

na. Pradé kapendem, raris kawéntenang kulkul patahu olih Kelihan Adat utawi sané kapituduh, saha arah-arahan ngrombo karya.

ca. Panyanggran banjar salantur ipun, inggih punika :

1. Suang-suang krama banjar nedunang patus manut pararem banjar.

2. Ngrombo ngaryanin eteh-ete.

3. Nganter ka sétra jantos pamendeman punika puput.

(3). Tan kéngin nglelet langkungan ring, 3 (tigang) rahina, saha polih gebagan anut paétangan Kelihan Adat, sajabaning lantur kageseng utawi kaabén.

(4). Tan kalugra nginepang bangbang sawa.

(5). Tan kalugra mendem utawi ngeseng sawa ring rahina sané kekeran désa saha rikala nangken :

ha. Piodalan jagat.

na. Piodalan ring Kahyangan Tiga.

ca. Rahina Purnama utawi Tilem.

(6). Pradé wénten kalayu sekar rikala piodalan utawi nyantos tigang rahina durung mapendem keni rahina kekeran désa, kadadosang mendem tanpasadok, tur mamargi wengi.

(7). Pratisentana sané magenah ring dura désa nanging sané mapakraman ring Désa Adat Sembung, kadadosang mendem ring sétra Désa Adat Sembung ritatkala kaduhkitan.

- (8). Sapasira ugi sané tan mapakraman ring Désa Adat Sembung tan kalugra mendem utawi ngeseng sawa ring sétra padruén désa, sadurung kaingkupin antuk krama désa.

#### Pawos 45

- (1). Yan wénten sané kalayu sekar sangkaning salah pati utawi ulah pati kabengawan lan sapanungilannia, kéngin kapratéka sakadi patuté risampun kamanggala antuk upacara panebusan lan pangulapan.
- (2). Yan wénten wong wadon kalayu sekar ngadut manik, wenang kapratéka sapatuté, kapendem utawi kageseng nanging garbania katetehin antuk batu.
- (3). Yan sang kalayu sekar malantaran gering abot utawi nglahlah, patut digelis kakingsanang pamendeman.
- (4). Yan wénten sang kalayu sekar sejeroning palemahan karang, tegal utawi genah anak tiosan, kulawarga sané madué sawa punika patut ngamargiang upacara pamrascita genahé inucap saha genahé sané anggé pamargin sawa.
- (5). Mangdéné palemahan sétra inucap manggeh genah resik saha asri, patut kamanggehang pamargi sakadi ring sor puniki :
  - ha. Ring sétra tan kadadosang ngangon saha ngenahang barang-barang tan padruén désa.
  - na. Sang makarya bangbang patut ngwaliang barang-barang sané kakeniang sajeroning bangbang inucap.
  - ca. Sasampuné upacara atiwa-tiwa, wenang ngamargiang pangreresik sapatuté.
  - ra. Pamendeman sawa tan kalugra nganggé gegumuk langgeng utawi batu masemén.

#### Pawos 46

Mungging cuntaka kalayu sekar, sakadi ring sor :

- (1). Krama banjar saking matetenger kulkul nyantos arahina sasampun mapendem utawi mageseng.
- (2). Kulawarga pangapit saking kalayu sekar nyantos 3 (tigang) rahina sasampun mapendem utawi mageseng.
- (3). Kulawarga sané madrué kaduhkitan saking kalayu sekar nyantos 12 (roras) rahina sasampun mapendem utawi mageseng.

(4). Tan kenéng cuntaka luiré :

ha. Sang Sulinggih saha Pamangku Kahyangan Tiga.

na. Rikala piodalan risampun ngalang sasih utawi ngalang tengah.

#### Pawos 47

(1). Atiwa-tiwa kamargiang antuk :

ha. Nyuasta geni, saantukan tan ngagah utawi sawa tan kakeniang.

na. Sawa pratéka.

(2). Panemayan atiwa-tiwa wénten kalih pawos :

1. Ngabén ngamasa utawi ngerit sajeroning désa utawi banjar kamargiyang manut pararem.

2. Ngabén niri-niri dedadakan utawi mabuaka kadadosang sajeroning 7 (pitung) rahina majalaran antuk Pituduh Parisada Hindu Dharma.

(3). Dudonan atiwa-tiwa, kawit saking séda utawi ngagah, ngeseng jantos pamargin nganyut.

#### Pawos 48

(1). Patus pangabénan gung alit ipun manut paiguman pararem ring banjar, kepah dados 3 (tigang) pawos, inggih punika :

1. Patus lan ayah-ayah ngabén ngamasa utawi ngerit.

2. Patus lan ayah-ayah ngabén dedadakan.

3. Patus lan ayah-ayah ngabén mabuaka.

(2). Pasuguh utawi panginguné ring krama banjar ngawit ngayah nyantos puput, manut abot dangan kawéntenan karya, saha paigum ring banjar.

#### Palet 4

### **Indik Manusa Yajnya**

#### Pawos 49

(1). Manusa Yajnya inggih punika upacara dharmaning manusa, ngawit saking patemoning kama petak kalawan kama bang sajeroning garba ngantos kalayu sekar riwekas.

- (2). Upacara-upacara manusa yajnya madudonan sakadi ring sor :
- ha. Magedong-gedongan duk pangrempini ibiyang.
  - na. Duk sang kamaréka medal.
  - ca. Kepus udel.
  - ra. Mayusa roras rahina.
  - ka. Tutug kambuhan utawi mayusa 42 rahina.
  - da. Nigang sasihin.
  - ta. Pawetuan utawi ngodalan ngenem sasih.
  - sa. Tutug kelih, ngraja swala wadoné ngembakin lanangé.
  - wa. Matatah utawi mapandes.
  - la. Pawiwahan.
  - ma. Mawinten utawi mabersih.
- (3). Upacara-upacara inucap, kéngin kanista - madia - utama manut sastra agama saha Catur Dresta maka buatan Désa Dresta ngawinang sima cara désa, mangda sasidayan kapuput antuk sang sulinggih.

Palet 5

### **Indik Bhuta Yajnya**

Pawos 50

- (1). Bhuta Yajnya inggih punika upacara pabyakala ring pertiwi lan kahyangan, sarwa prani saha upacara ring bebhutan.
- (2). Upacara pabyakala ring sarwa prani, luihé :
- ha. Ring sarwa tumuwuh, rikala Tumpek Pangatag utawi Tumpek Wariga.
  - na. Ring sarwa ingon-ingon, rikala Tumpek Andang utawi Tumpek Uyé.
  - ca. Upacara pakala-kalan manusa manut wiguna kabawos pabyakala.
- (3). Upacara pabyakala ring pertiwi, kahyangan lan bebhutan kawastanin macaru.

- (4). Pacaruan inucap ring ajeng, kanista-madya-utama manut wigunan, madudonan sakadi ring sor puniki:
- |                 |                  |
|-----------------|------------------|
| ha. Ēka Sata    | ra. Resi Ghana   |
| na. Panca Sata  | ka. Tawur Agung  |
| ca. Panca Sanak | da. Panca Kelud. |
- (5). Sios punika taler kamargiyang Upacara Ngusaba Désa utawi Ngusaba Nini ring Désa Adat Sembung manut dudonan dresta lan sastra agama kanista, madya, utama, suang-suang masengker :
- ha. Nangken 10 (dasa) warsa dudonan Utama.
- na. Nangken 15 (limolas) warsa dudonan Madya.
- ca. Nangken 20 (kalih dasa) warsa dudonan Kanista.
- (6). Sajeroning upacara ring ajeng, kawéntenang taler upacara :
- Mejojot-jotan utawi Yajnya Sésa nyabran wusan ngrateng.
  - Masegeh rinuju sandikala manut wiguna.
  - Masesapuh rikala pacang puja wali ring kahyangan.

Pawos 51

- (1). Nangken ngwarsa rikalaning Tilem Kasanga, kawéntenang Tawur Kasanga ketah kabawos Ngrupuk maka cihna pacang magpag rahina Panyepian.
- (2). Upacara panyepian sané kamargiang antuk krama désa sami, inggih punika :
- ha. Amati Geni, tan kéngin mapi-api saha mucehang geni ring raga.
- na. Amati Karya, tan kéngin makarya maka cihna negdegang raga.
- ca. Amati Lelungayan, tan kéngin malelungayan.
- ra. Amati Lelangan, tan kéngin maoneng-oneng, masuara ghora, majejudén saha sapanunggilan ipun.
- (3). Pabratan panyepian punika kamargiang saking semeng jantos bénjang semeng, kasuarayang tetengeran kulkul désa maka cihna Pangembak.
- (4). Sang mamurug kecapé ring ajeng, keni pamidanda manut pararem désa, kamargiang antuk prajuru adat utawi patelik.

- (5). Riwus rahina Nyepi, ring rahina Ngembak Geni, maka cihna pangawit Isaka Warsa, patut suang-suang warga désa ngaksama ngamargiang Dharma Shanti.

## SARGA VI

### SUKERTA TATA PAWONGAN

Palet 1

#### Indik Pawiwahan

Pawos 52

- (1). Pawiwahan inggih punika patemoning purusa pradana malarapan panunggalan kayun suka cita kadulurin upasaksi sekala niskala.
- (2). Pamargin pawiwahan kapatut sakadi:
  - ha. Pepadikan kamanggala antuk pasuitran.
  - na. Ngrorod majalaran ngrangkat riyin wawu kakrunayang.
  - ca. Nyeburin utawi nyentana.
- (3). Pidabdab sang pacang mawiwaha patut majalaran :
  - ha. Sampun manggeh deha kalawan teruna prasida nganutin Pasuara Pawiwahan Sang Angawa Rat.
  - na. Sangkaning pada rena arsa tan kapaksa.
  - ca. Tan gamia gamana nganut kecaping agama.
  - ra. Kawisudiang malarapan upacara sudi wadani yan pradé ngambil tios agama.
- (4). Pamargin pawiwahan mangda taler nganutin pituduh Sang Angawa Rat utawi Pasuara Pawiwahan (*Undang-Undang Perkawinan No. 1 Tahun 1974*).
- (5). Pawiwahan sané kapatutang ring Désa Adat Sembung, sakadi ring sor puniki:
  - ha. Majalaran antuk mamadik, ngrorod, nyeburin manut tata cara jalarané suang-suang.
  - na. Sampun kamargiang pabyakala utawi pasakapan sané kapuput antuk sulinggih, saha kasinaksiang sekala niskala.
  - ca. Wénten pasaksi prajuru désa sané ngilikitayang pawiwahan inucap.

ra. Matengeran suaran kulkul.

ka. Sang mawiwaha kapatutang masadok ring prajuru adat, mangda ipun katedunang makrama désa, samaliha ngaturang praciri sané kamanggehang antuk pidaging pararem désa.

#### Pawos 53

Tata caraning pamargin pawiwahan, sakadi ring sor :

- (1). Sapa sira ugi pacang ngwarangang pakulawarga, patut masadok ring prajuru adat, mangdané polih maritatas manut tan manut kekecap parabian inucap.
- (2). Pepadikan majalaran antuk :
  - ha. Muputang pawilangan manut tata krama malarapan antuk canang piuning, saha runtutan ipun manut sesana.
  - na. Risampun puput pawilangan ipun, raris sang wadon utawi sané maraga pradana kairing budal ring pakubon sang lanang utawi sané maraga purusa, saha kalanturang antuk upacara pawiwahan utawi pabyakala.
  - ca. Mangda puput tumus sekala niskala, raris kulawarga purusa ngamargiang plepeh bébas utawi majaan saha matur piuning ring sanggah utawi mrajan kamulan sang pradana, malarapan banten pajati lan runtutan ipun manut dresta.
- (3). Pamargin Ngrorod majalaran antuk :
  - ha. Kulawarga sané ngambil patut ngwéntenang pajati utawi ngluku sakirangnyané kalih diri saha makta praciri sesuluh.
  - na. Pagenah sang sané ngrorod ngantén tan kapatutang ngranjing ring pakubon sang lanang sadéréng mabyakala.
  - ca. Yan pradé kulawarga sang wadon mapikayun jagi maritetes, pamargin panetesan inucap kasaksiang antuk prajuru adat, saha Sang Angawa Rat sakirang-kirangnyané Manggala Désa.
- (4). Sajeroning pajati panglukuan patut:
  - ha. Kamanggala antuk geng pangapura arep ring reraman utawi panglingsir sang wadon.

- na. Paiguman bawos paséwakan utawi palegayan idih kaidih saha padéwasan pakerab kambéyan riwekas.
- ca. Pradé pajati tan katerima, panglaksana panglukuan kamargiang manut sima, ketah ipun jantos ping tiga.
- ra. Sasampuné puput pawilangan pamargin ngrorod punika, tata upacara salantur ipun manut sakadi pamargin pepadikan.

(5). Pamargin nyeburin majalaran antuk :

- ha. Pinih riyin patut kawéntenang paiguman kulawarga purusa lan pradana, saha kamanggehang pinaka sentana rajeg.
- na. Risampun polih kaingkupan pariindik pawilangan sakadi ring ajeng, kalanturang antuk upacara Widi Widana manut ring kecap sastra agama.
- ca. Pamekas kasaksiang ring prajuru adat lan kailikitayang sapatuta, saha kasiarang ring paruman krama.

Palet 2

### **Indik Nyapian**

Pawos 54

- (1). Pawiwahan prasida kauwusang malarapan antuk palas, utawi silih sinunggil séda utawi kalayu sekar.
- (2). Sang palas utawi wusan mapikuren riantukan silih sinunggil kalayu sekar mapiteges balu, balu lanang utawi balu wadon.
- (3). Palas mapikuren wénten kalih pawos, inggih punika sangkaning pada lascarya miwah mawiwit wicara.
- (4). Sang ayat palas mapikuren patut atur supéksa pailikitan riyin ring Sang Rumawos (*Pengadilan Negeri*), wastu tinas apadang pamutusé kabawos nyapian, wawu prajuru adat nyiarang kawéntenannia ring paruman krama.

Pawos 55

Tata cara palas mapikuren manut ring désa pakraman, inggih punika :

- (1). Sang katinggal séda antuk sinalih tunggil lanang utawi wadon, patut atur supéksa ring prajuru adat sumangdéné tan katedunang malih makrama jangkep utawi ayah lanang wadon.
- (2). Sané katedunang malih makrama jangkep manut pangunadika ring banjar inggih punika :
  - ha. Sang balu lanang sané madrué sentana wadon sampun munggah deha, samaliha tan candala.
  - na. Sang balu wadon sané madrué sentana lanang sampun munggah teruna samaliha tan candala.
- (3). Nyapian utawi palas sangkaning pada lascarya, kapatutang :
  - ha. Naur prabéya pasaksi sinalih tunggil sami aparo.
  - na. Pagunakayan polih pahan pada.
  - ca. Tetadtadan utawi bebekelan suang-suang kakuasa niri-niri.
  - ra. Warisan kulawarga kakuasa antuk sang purusa.
  - ka. Ngweruhin saha ngupa jiwa pratisentana manut swadharmaning guru rupaka.
  - da. Ngelung jinah manut panglokika prajuru adat.

Pawos 56

Pradé sang palas mapikuren riwekas kacihnan adung malih, patut:

- (1). Atur supéksa ring prajuru adat.
- (2). Ngamargiang upacara pawiwahan malih.
- (3). Naur pamidanda manut pararem.

Pawos 57

- (1). Sang balu punika kabinayang dados :
  - ha. Balu wadon wit sentana rajeg, miwah balu wadon boya sentana.
  - na. Balu lanang kapurusan, miwah balu lanang nyeburin.

- (2). Swadharmaning balu inucap patut :
- ha. Ngamanggehang pati brata tan kéngin ngamargiang paradara utawi dratikrama, saha nginggilang sesana pakulawargan.
  - na. Ngutsahayang waris miwah pagunakayan, nanging tan kéngin ngadol, ngadéang, makidihang sajawaning kabébasang saking pratisentana utawi kulawarga kapurusa.
  - ca. Kéngin ngedih utawi ngangkat sentana pradé wénten pidabdab sadurung sinalih tunggil séda, saha kabébasang antuk kulawarga sinanggeh kapurusa.
  - ra. Kaprasida mawiwaha malih risampuné polih kaadungan kulawarga kapurusa, saha manut pidabdab Pasuara Pawiwaha Sang Angawa Rat.
- (3). Balu kaucap tan pageh, sakadi ring sor :
- ha. Drati krama utawi para dara.
  - na. Matilar saking pakubon tan masadok jantos 6 (enem) sasih.
  - ca. Lémpas ring swadharma saha tan prasida ngeséhin solah maprawerti arep ring pituduh kulawarga.
- (4). Yan pradé sang balu inucap tan pageh ring swadharma, kabawos tan patut, dados kakésahang saking pakubon kang sinanggeh purusa.

Palet 3

### **Indik Sentana**

Pawos 58

Kang sinanggeh sentana sakadi ring sor :

- (1). Pratisentana inggih punika sentana sané wetu saking pawiwahan kapatut.
- (2). Sentana peperasan inggih punika, sentana sané mawiwit nunas utawi ngangkat sentana kadulurin antuk upasaksi sekala niskala, saha kailikitayang ring prajuru adat lan Sang Rumawos.
- (3). Sentana Rajeg inggih punika pratisentana wadon sané kamanggehang purusa tur sampun kaupacara miwah kasaksiang antuk prajuru adat.
- (4). Pradé wénten wetu sentana saking pawiwahan tan kapatut, mangda tan kawastanin wong bebinjat utawi astra, patut kamanggala antuk upacara panyangaskara saha kasaksiang prajuru adat.

Pawos 59

Sané dados kaarsang sentana rajeg inucap mawiwit saking :

- (1). Pratisentana wadon sané sampun kamanggehang dados pratisentana purusa.
- (2). Sang kamanggehang sentana rajeg patut masadok ring prajuru adat, mangda kasiarang ring paruman krama saha upasaksi sekala niskala.

Pawos 60

Tatacara ngangkat sentana peperasan, luihé :

- (1). Pinih riyin wénten kacumpuan pawilangan kulawarga sané jagi kaangkat lan kulawarga sané ngangkat.
- (2). Risampuné polih kacumpuan parembayané, patut masadok ring prajuru adat, saha prajuru adat mangda nyiarang ring paruman krama.
- (3). Mawates 3 (tigang) sasih tan wénten pasadok sané tan nyumponin paimdik ngangkat sentana inucap, wawu dados kalanturang upacara pamerasan majalaran upasaksi sekala niskala.
- (4). Salantur ipun pamerasan inucap kailikitayang olih prajuru adat, saha kalanturang ring Sang Rumawos.
- (5). Sentana peperasan kabawos sumeken saantukan sampun nganutin paridabdab sakadi ring ajeng.

Pawos 61

Sang sané patut kaangkat sentana peperasan, luihé :

- (1). Jadma sané magama Hindu utawi sané kayun magama Hindu, mawiwit :  
ha. Kulawarga utawi pepernahan nedunang sang meras.  
na. Kulawarga saking purusa utawi lelintihan tunggal kawitan.
- (2). Yan pradé tan polih kulawarga sakadi ring ajeng (ha) utawi (na), wawu kéngin sakama-kama, sakéwanten sané maagama Hindu.
- (3). Kadadosang ngangkat sentana langkungan ring adiri lanang utawi wadon.

Palet 4

### Indik Warisan

Pawos 62

- (1). Warisan inggih punika tetamian artha brana saha ayah-ayah tetegenan ngupadi sekala niskala saking leluhurnia arep ring sentana.
- (2). Sang sinanggeh jati waris (*ahli waris*) inggih punika : pratisentana, sentana peperasan, sentana rajeg.
- (3). Pradé tan wénten sakadi ring ajeng, kang sinanggeh jati waris inggih punika : turunan purusa ngamungganghang, turunan purusa kasamping, turunan purusa nedunang.

Pawos 63

Swadharmaning jati waris, luiré :

- (1). Ngupakara pawaris utawi sang mapiturun manut tata cara agama Hindu saha dresta ring désa pakraman.
- (2). Naurin utang-utang sekala niskala manut panglokika.
- (3). Nguasayang saha mecikang tetamian sanggah mrajan miwah nyledihiniñ ayah-ayah tetegenan saking pawaris.

Pawos 64

Pidabdab pedum waris, inggih punika :

- (1). Risampuné puput ngamargiang Pitra Yajnya saha nuntun Déwa Hyang kang pawaris.
- (2). Risampuné utang-utang pawaris kataur jantos buntas.
- (3). Ngwéntenang paiguman ring indik peduman waris inucap.
- (4). Yan tan wénten kaadungan, patut nunas tetimbangan ring prajuru désa minakadi kertha désa.
- (5). Yan pradé malih tan wénten kaadungan, patut nunasang ring Sang Rumawos.
- (6). Indik pahpahan waris punika nganutin dresta saha pasuara Sang Rumawos.

- (7). Sinalih tunggil jati waris, kéngin tan polih pahan, pradé :
- ha. Alpaka guru rupaka.
  - na. Nilar kawitan lan sesananing agama Hindu.
  - ca. Sentana rajeg kesah mawiwaha utawi pratisentana nyeburin sané kabawos Ninggal Kedaton.
- (8). Boya jati waris kéngin muponin anut dudonan, luihé :
- ha. Sentana wadon sadéréngé késah mawiwaha, utawi alpaka guru, miwah madrué oka tan kaangkenin antuk wong atua raré inucap. Indik ngwaris punika wantah pikolih pagunakayannia kémawon.
  - na. Balu wadon utawi balu lanang nyeburin suang-suang boya sentana.
  - ca. Mulih deha utawi teruna riantukan ring pawiwahan pecak sampun kabawos Ninggal Kedaton.
- (9). Yan pradé wénten krama désa sané camput utawi putung, patut kaupakara antuk krama désa sami, tur yan wénten warisan ipun ngranjing dados druén désa.

## SARGA VII

### WICARA LAN PAMIDANDA

Palet 1

#### Indik Wicara

Pawos 65

- (1). Sané wenang mawosang makadi pamatut utawi pamutus wicara ring Désa Adat Sembung, inggih punika Kelihan Désa sinanggeh Kertha Désa.
- (2). Pradé kang mawicara tan wénten cumpu ring pamatut utawi pamutus kertha désa inucap, kéngin nunasang wicara inucap ring Sang Rumawos (*Pengadilan Negeri*).

Pawos 66

- (1). Sahanan wicara mawiwit kacorahan sakaluir sinanggeh nungkasin pidaging awig-awig, pasuara miwah pararem désa lan banjar, prajuru patut digelis mawosin manut dudonan ipun tan nyantos pasadok.

- (2). Sajawaning wicara ring ajeng, patut nyantos pasadok sang nunas bawos.
- (3). Panepasé patut pastika nyantenang iwang patut malarapan Tri Pramana : saksi - ilikita - bukti miwah tan maren nepék ring Catur Dresta.

Palet 2

**Indik Pamidanda**

Pawos 67

- (1). Désa saha banjar-banjar wenang niwakang pamidanda ring krama désa utawi krama banjar sané sisip.
- (2). Paniwak pamidanda inucap kamargiang olih Kelihan Désa saha Kelihan Banjar utawi Adat.
- (3). Bacakan pamidanda, luihé :
  - ha. Ayahan panukun kasisipan.
  - na. Dana artha saha panikelnia.
  - ca. Barang rerampagan.
  - ra. Kasepékang.
  - ka. Panyangaskara.
- (4). Pamidanda sané katiwakang patut mesor singgih manut ring kasisipan ipun.
- (5). Artha utawi Raja Brana pamidanda ngranjing dados druén désa utawi banjar.

Pawos 68

- (1). Krama sané langkung ring 3 (tigang) paruman nglantur tan naur dedandan miwah urunan, wenang karampag.
- (2). Pradé ngamargiang rerampagan, mangdané nganggé panglokika saha tata cara sakadi ring sor puniki :
  - ha. Kaping ajeng prajuru adat nyiarang kawéntenan rerampagan punika, menawi sang karampag mrasidayang digelis muntasang dedandan sané katiwakang punika.
  - na. Rerampagan kamargiang antuk Kelihan Désa utawi Kelihan Adat kasarengin sakirang-kirang ipun kalih diri maka saksi.

- ca. Sang ngrampag sangkaning darsana ngambil barang utawi nyawénin tanem tuwuh, akéhnia manut ring tetengeran ageng utang sang karampag.
- ra. Prajuru adat miteketang mangda barang-barang sané karampag digelis katebus masengker pitung rahina. Salantur ipun barang rerampagan inucap pacang kalélang utawi kaadol.
- ka. Tan kapatutang ngrampag barang sané patut inggilang manut agama miwah sané prasida ngamademang pangupa jiwa sang karampag.

Pawos 69

- (1). Pradé sang karampag ngwara utawi ngalagin panglaksana rerampagan inucap mawasta sampun tan nganutin awig-awig, wenang karang pumahannyané kadaut antuk désa.
- (2). Samaliha yan purun taler ngalagin panglaksana kadi ring ajeng, tan wénten pamargi malih sajawaning krama inucap dados kasepé kang antuk désa.
- (3). Pamidanda inucap ring ajeng keni buntas risampun sang kakeninin :
  - ha. Nunas geng pangampura ring krama désa riantukan nguak pasubaya.
  - na. Naur pangargan panguak pasubaya duk pacang karampag kadulurin prayascita panyapsap kaiwangan ring désa.

SARGA VIII

**NGUWAH NGUWUHIN AWIG-AWIG**

Pawos 70

- (1). Nguwah nguwuhin awig-awig désa adat puniki kalaksanayang antuk paruman désa.
- (2). Awig-awig puniki kamargiang ngawit kaingkupin lan kapasupati risampun wus kararemin.

Pawos 71

- (1). Sakaluiring sané wénten sadéréngé, patut kaanutang ring daging awig-awig puniki.
- (2). Sakaluiring sané durung munggah sajeroning awig-awig puniki, patut kalaksanayang manut tata cara sané sampun ketah mamargi kadulurin antuk gilik peparuman utawi pararem-pararem.

- (1). Awig-awig puniki kasungkemin risampuné puput kaayum duk rahina Sukra, Pon wuku Tambir, Purnama sasih Kadasa, Isaka warsa 1930, tanggal maséhi 21 Maret tahun 2008, magenah ring Pura Désa / Balé Agung Sembung.
- (2). Awig-awig puniki kalingga tanganin olih Kelihan Désa Adat Sembung kasarengin Kelihan Adat Banjar Dajan Peken, Kelihan Adat Banjar Pasekan, Kelihan Adat Banjar Tauman, Kelihan Adat Banjar Belang saha kasaksinin antuk para Panglingsir.


**Luir sang nglingga tanganin :**

(1). Kelihan Désa Adat Sembung




(Ida Bagus Rai Surya Adnyana)

(2). Kelihan Adat Banjar Dajan Peken.



I Madé Sudarma.

(3). Kelihan Adat Banjar Pasekan.



I Nyoman Seleg.

(4). Kelihan Adat Banjar Tauman.



I Ketut Jegog.

(5). Kelihan Adat Banjar Belang.



I Ketut Pater.

Kasaksinin :

(1). Perbekel Sembung



I Madé Karyana SĒ.

(2). Camat Mengwi



Luh Suryaniti, S.Sos.

Mengetahui dan telah dicatat

Pada tanggal : .....

Nomor : .....

BUPATI BADUNG



Anak Agung Gdé Agung, SH.